

Málið hefur verið rekið á bæjarþingi Hafnarfjarðar, en samkvæmt bréfi dóms- og kirkjumálaráðuneytisins til bæjarfógetans í Hafnarfirði, nr. 324 frá 19. ágúst 1976, eru Garðakaupstaður og Hafnarfjarðarkaupstaður ein dómpinghá, sbr. 72. gr. laga 85/1936, og hefur bæjarþing hinnar sameiginlegu dómpinghár verið nefnt bæjarþing Hafnarfjarðar til hægðarauka.

Dómsorð:

Hrundið er kröfu stefnanda, Sigurðar Gíslasonar, um, að nafn hans verði tekið á kjörskrá í Garðakaupstað við sveitarstjórnarkosningar, sem fram eiga að fara 28. maí 1978.

Laugardaginn 27. maí 1978.

Nr. 196/1978. **Kristín S. Kvaran**

(Benedikt Sveinsson hrl.)

gegn

bæjarstjórn Garðakaupstaðar

(Ágúst Fjeldsted hrl.).

Kosningarréttur. Lögheimili. Sératkvæði.

Dómur Hæstaréttar.

Mál þetta dæma hæstaréttardómarnir Ármann Snævarr, Benedikt Sigurjónsson, Björn Sveinbjörnsson, Logi Einarsson og Magnús Þ. Torfason.

Afrýjandi hefur áfrýjað máli þessu með stefnu 25. maí 1978. Krefst hún þess, að stefnda verði dæmt skylt að taka nafn áfrýjanda á kjörskrá þá í Garðakaupstað, sem gildir við bæjarstjórnarkosningar þær, sem fram eiga að fara 28. maí 1978.

Stefndi hefur lýst yfir því, að hann hreyfi engum andmælum gegn kröfu áfrýjanda.

Fyrir Hæstarétt hefur verið lagt ljósrit af samnorrænni flutningsboðun fyrir áfrýjanda.

Samkvæmt samnorrænu flutningsvottorði, undirrituðu af Einari B. Kvaran, eiginmanni áfrýjanda, 15. júní 1977, flutti áfrýjandi ásamt eiginmanni sínum og tveimur börnum þeirra lögheimili sitt frá Hörpúlundi 3 í Garðakaupstað til Oslóar. Er flutningsdagur talinn 27. júní s. á. Samkvæmt því, sem fram er komið í málinu, verður að miða við, að áfrýjandi hafi farið til Noregs til náms. Ekki var gerð nein athugasemd um það á flutningsvottorðinu, að lögheimili áfrýjanda skyldi vera áfram í Garðakaupstað, sbr. 10. gr. laga nr. 35/1960, og ekki nýtur heldur við í málinu neinna annarra gagna, er sýni slíka fyrirætlan. Samkvæmt samnorrænni flutningsboðun, áritaðri af Oslo folkeregister, er áfrýjandi talinn hafa tekið þar lögheimili 29. júní 1977.

Með þessari athugasemd ber að staðfesta hinn áfrýjaða dóm að niðurstöðu til.

D ó m s o r ð :

Hinn áfrýjaði dómur á að vera óraskaður.

S é r a t k v æ ð i

Ármanns Snævarr hæstaréttardómara.

Samkvæmt 10. gr. laga nr. 31/1960 er þeim, sem dveljast erlendis við nám, rétt að telja lögheimili sitt í sveitarfélagi, þar sem þeir áttu lögheimili, er þeir fóru af landi brott. Samkvæmt gögnum máls vakir fyrir áfrýjanda að dveljast um eins árs skeið við nám í Noregi. Eins og hér stendur á, þykir eigi verða talið, að áfrýjandi hafi ætlað sér að slíta lögheimili sínu hér á landi með flutningstillkynningu þeirri, er greinir í atkvæði meiri hluta dómara, svo að varði missi kosningarréttar hennar við framangreindar kosningar. Óvefengt er, að hún átti lögheimili að Hörpúlundi 3 í Garðakaupstað, er hún fluttist af landi brott. Ber við það að miða, að áfrýjandi fullnægi skilyrðum 18. gr. laga nr. 58/1961, svo sem henni er breytt með 1. gr. laga nr. 81/1967, sbr. og 9. gr. laga nr. 58/1961, sbr. enn fremur 1. gr. laga nr. 5/1966, er breytir 1. gr. laga nr. 5/1962 um sveitarstjórnarkosningar.

Samkvæmt þessu verður krafa áfrýjanda í málinu tekin til greina.

D ó m s o r ð:

Stefnda, bæjarstjórn Garðakaupstaðar, ber að taka nafn áfrýjanda, Kristínar S. Kvaran, á kjörskrá þá, sem gildir við bæjarstjórnarkosningar í Garðakaupstað 28. maí 1978.

Dómur bæjarþings Hafnarfjarðar 24. maí 1978.

Mál þetta, sem dómtekið var í dag, hefur Kristín S. Kvaran (5766-4118) höfðað vegna sveitarstjórnarkosninga 28. maí nk. gegn bæjarstjóra Garðabæjar f. h. bæjarstjórnar Garðabæjar á bæjarþingi 23. maí 1978, þar sem mætt var af hálfu stefnda og fyrirtaka málsins samþykkt.

Hún krefst þess að verða tekin á kjörskrá í Garðabæ.

Af stefnda hálfu hefur kröfu stefnanda ekki verið mótmælt.

Samkvæmt vottorði Hagstofu Íslands, þjóðskrár, var stefnandi á íbúaskrá hinn 1. desember 1977 skráð í Noregi. Síðasta lögheimili hennar á Íslandi fyrir flutning var Hörpulundur 3, Garðabæ. Hún er fædd 5. janúar 1946.

Stefnandi kveður málavexti þá, að hún hafi um nokkurt skeið verið við nám í Oslóborg í Noregi. Áður en hún hafi haldið til náms hafi hún verið búsett að Hörpulundi 3, Garðabæ, enda haft þar lögheimili. Við athugun kjörskrár hafi komið í ljós fyrir skömmu, að nafn hennar hafði fallið út af kjörskrá og hún verið skráð af Hagstofu Íslands í Noregi.

Þar sem kærufrestur til sveitarstjórnar, sbr. 24. grein laga nr. 52/1959 og 1. grein laga nr. 5 frá 1962, sé útrunninn, sé nauðsyn að höfða mál þetta með stoð í 10. gr. laga nr. 35/1960 um lögheimili.

Samkvæmt 1. gr. laga nr. 52/1959, sbr. 1. gr. laga nr. 5/1962 um sveitarstjórnarkosningar er það skilyrði kosningaréttar, að maður eigi lögheimili hér á landi. Samkvæmt 15. gr. laga nr. 52/1959, sbr. 1. gr. laga nr. 5/1962, skal taka á kjörskrá þá, sem voru heimilisfastir í sveitarfélagi 1. desember næst á undan þeim tíma, er kjörskrár skulu lagðar fram. Gögn málsins bera með sér, að stefnandi var ekki heimilisföst á Íslandi 1. desember sl. Hún virðist því ekki hafa neytt heimildar 10. gr. lögheimilislaganna til

að halda lögheimili sínu á Íslandi þrátt fyrir námsdvöl. Hún hefur þannig ekki fullnægt skilyrðum kosningalanganna til þess að verða tekin á kjörskrá í Garðakaupstað, og ber því að hafna kröfu hennar.

Hlökkver Kjartansson, fulltrúi bæjarfógeta, kvað upp dóm þennan.

Málið hefur verið rekið á bæjarþingi Hafnarfjarðar, en samkvæmt bréfi dóms- og kirkjumálaráðuneytis til bæjarfógetans í Hafnarfirði, dags. 19. ágúst 1976, er Garðakaupstaður og Hafnarfjarðarkaupstaður ein dómsþinghá, sbr. 72. gr. laga nr. 85/1936, og hefur bæjarþing hinnar sameiginlegu dómsþinghár verið nefnt bæjarþing Hafnarfjarðar til hægðarauka.

Dómsorð:

Hrundið er kröfu stefnanda, Kristínar S. Kvaran.

Laugardaginn 27. maí 1978.

Nr. 197/1978. **Einar B. Kvaran**

(Benedikt Sveinsson hrl.)

gegn

bæjarstjórn Garðakaupstaðar

(Ágúst Fjeldsted hrl.).

Kosningarréttur. Lögheimili. Sératkvæði.

Dómur Hæstaréttar.

Mál þetta dæma hæstaréttardómararnir Ármann Snævarr, Benedikt Sigurjónsson, Björn Sveinbjörnsson, Logi Einarsson og Magnús Þ. Torfason.

Áfrýjandi hefur áfrýjað máli þessu með stefnu 25. maí 1978. Krefst hann þess, að stefnda verði dæmt skylt að taka nafn áfrýjanda á kjörskrá þá í Garðakaupstað, sem gildir við bæjarstjórnarkosningar, sem fram eiga að fara 28. maí 1978.